



## GNIESSER 2022

### Sujet: EGO-MAIN-Y

(Persoone und Handlige sinn frei erfunde, Äänligkaite mit daatsächlige Begääbehaite wääre rain zuefellig)

***Jeede macht was är will – oder:  
Jeede MAINT, är macht was är will***

Dr Trend isch glaar ass dr (Naarr)zischt in Egoismus baadet.  
D Freihait die höört döörten uff wo sy den Andere schaadet:

Wo sinn nur Wäärt wie Aastand bliibe Ruggsichtsnaam und Toleranz?  
Die Aigeschafte sinn vertriibe, d Gsellschaft glyycht em Doodetanz.

Jeede isch sich in dr Gryyse für dr Zwägg vo Aigeschutz, sälbscht dr Nöggscht zum sich bewyyse und doo druss zieh sy Aigenutz.

Är daibelet, duet gärn erbrässe dr Autograat als Rumpelstilz;  
d Böösaartigkait die isch vermässe wie s Gift vo roote Fliegepilz.

Am Mittwoch schwaafle d Bolytigger mit vyyl um d Oore und künschtligem Stress;  
im Saal denn no vyyl Grytigger s isch wider Zyt für dr Point de Presse.

Glogge schwinge bruucht vyyl Graft, dr Dryychler-Ueli, noodysnoo, hets au brobiert und drotz sym Saft sott äär – kollegiaal - dr Root verloo.

En Oschtdeschpoot mit grossem Drugg mer wüssen alli wär das isch, hebt Öl und Gaas für d EU zrugg und maint är haig e groosse Fisch.

In London schyynts, drotz em Verbott «E Party lauft!» so haisst s im Tweet;  
dr Blondy maint är syggi Gott im Gaarte vo dr Downing Street.

Mer wüsse doch wie uns das schaadet doch Oscht und Wescht, es isch e Gruus, wie dr Dagobert in Münze baadet setzt wyter uff fossyyle Pfuus.

Dr Draum vom schöne blaue Meer e Grünfaart bueche, dr Bryys no drugge. All inclusive! das lieb y seer egaal öb d Fisch mien Schwääröl schlugge.

Nach Glasgow raise die Expäarte zer Klimakonferänz, s isch bschisse; me duet das gaar nid grooss bewäarte nimmt s Fluugi, daas mit guetem Gwisse.

Dr Jeff-Chef mit em Namme Bezos  
sait, Wältruumtourismus syg dr Trend!  
Är haigi gnueng vo däane Pesos,  
s macht nüt wenn unde d Äärde brennt.

E Klimakiller s isch brofaan  
syg d Kue mit iirem fuule Duft,  
sy fuurzi lyterwyys Methan  
versaut die ganzi Alpeluft.

Umwälthauptstadt wämmer wäärde  
und köpft, ojee, die Bäum die fyne,  
rysst gsundi Ahorn uss dr Äärde  
dasch s BeeDee mit dr Guillotyne.

Nach 50 Joor im glyyche Huus -  
wird s für d Senioore gaar kai Spass;  
s goot um d Rendite, s isch e Gruus -  
kunnt d Woonigskündigung en masse.

D Drämmli-Chefeten oobe  
zerscht Sälschtbedienig, denn lutte Gnall,  
duet sich als Goldhelm-Sieche loobe  
doch Hoochmuet dä kunnt vor em Fall.

Vor em Fiskus d Stüür verstegge  
d Pandora Papers dien s enthülle;  
sy zaigen uff, wie Anderi verregge  
und Ryychi iiri Kasse fülle.

Die Männer in de roote Gwänder  
eb Kardinääl, eb Benedetto,  
au die us vyyle andere Länder  
sy wüsse nüt ... sy sinn «perfetto».

Uff em Haimwäg in dunggler Nacht  
öb Unterfiehrig oder Paargg,  
zieht my grad aa e hübschi Bracht  
bi schöne Maitli wird y staargg.

S Adrenalyyn bumpt Bluet in d Fusch  
und Gwalt die stygt mit Alkohol,  
denn s Mässer zieh, bis alles kusch  
kai Wunder isch die Biire hool.

Dr Hunger bloggt, halt s nümme uss  
pflömm my in Bus und iss dr Mägg,  
nimm d Frites no uss dr Gugge druss  
hebb d Fiess denn uff und mach Drägg.

E neue Begriff isch doo entstande  
«Ego-Liberté» als Woort vom Joor,  
en ander Hauptwoort kunnt abhande:  
d «Fraternité» – wo kunnt die voor?

Als grosses Ganzes unverhoole  
simmer gschüürt und überwacht,  
gsichtsloos - vo de Hoor bis zue de Soole  
und daas emänd bi Daag und Nacht.

***Macht wiirgglig jeede was är will?***